

**MALAYSIA**

**DEWAN RAKYAT**

**ATURAN URUSAN MESYUARAT**

**NASKHAH SAHIIH/BAHASA MALAYSIA**

<http://www.parlimen.gov.my>

**HARI SELASA, 5 APRIL 2016, PUKUL 10.00 PAGI**

**Bil. 18**

---

**PERTANYAAN-PERTANYAAN BAGI JAWAB LISAN**

1. PR-1341-L72974  
**Dato' Ir. Haji Nawawi bin Ahmad [ Langkawi ]** minta **MENTERI PEMBANGUNAN WANITA, KELUARGA DAN MASYARAKAT** menyatakan apakah bentuk bantuan dan latihan yang telah diberikan oleh pihak Kementerian dalam membantu golongan ibu tunggal yang ingin menceburi bidang keusahawanan serta berapa ramaikah yang telah berjaya daripada program tersebut.
2. PR-1341-L72137  
**Tuan Su Keong Siong [ Ipoh Timor ]** minta **MENTERI SUMBER MANUSIA** menyatakan status terkini perlaksanaan gaji minimum di Malaysia. Nyatakan juga impak dan/atau kesan daripada segi daya saing dan produktiviti sejak ia dilaksanakan di Malaysia. Apakah langkah Kementerian untuk menaikkan lagi jumlah gaji minimum di Malaysia.
3. PR-1341-L73328  
**Dato' Othman bin Aziz [ Jerlun ]** minta **MENTERI BELIA DAN SUKAN** menyatakan persiapan Malaysia untuk penyertaan dalam Sukan Olimpik Rio 2016 dan apakah pencapaian Program Podium dalam menghadapi Sukan Olimpik 2020 di Jepun.
4. PR-1341-L71821  
**Tuan Fong Kui Lun [ Bukit Bintang ]** minta **MENTERI WILAYAH PERSEKUTUAN** menyatakan bilakah para pendeposit Projek Plaza Rakyat akan menerima balik wang mereka berikutan urusan pemilikan baru projek telah dimuktamadkan.
5. PR-1341-L73291  
**Dato' Hasan bin Arifin [ Rompin ]** minta **MENTERI PERUSAHAAN PERLADANGAN DAN KOMODITI** menyatakan adakah kaedah saintifik digunakan bagi menentukan kadar "*dry rubber content*" agar memberikan pulangan yang adil kepada penoreh memandangkan kadarnya ditentukan peraih dan pengilang secara andaian dan apakah undang-undang untuk mengelakkan manipulasi harga getah.

6. PR-1341-L73433  
**Dato' Haji Mahfuz bin Omar [ Pokok Sena ]** minta **MENTERI PENGANGKUTAN** menyatakan :-
  - (a) apakah terma terma perjanjian dan persetujuan pelaksanaan operasi AES antara Kerajaan dengan Pengendali baru AES iaitu LTAT dan Boustead Holding Berhad termasuk model kewangan pengagihan bayaran saman kepada syarikat pengendali dan Kerajaan; dan
  - (b) berapa lamakah tempoh konsesi perkhidmatan AES diberikan kepada syarikat pengendali Perkhidmatan AES iaitu LTAT dan Boustead Holding Berhad.
7. PR-1341-L71667  
**Dato' Wira Othman bin Abdul [ Pendang ]** minta **MENTERI KERJA RAYA** menyatakan bilakah projek jalan empat lorong dari Kota Sarang Semut di Pekan Pendang boleh dimulakan.
8. PR-1341-L72173  
**Dr. Michael Jeyakumar Devaraj [ Sungai Siput ]** minta **MENTERI KESIHATAN** menyatakan bilangan kes baru Tibi di Malaysia dan juga bilangan kematian oleh kerana Tibi untuk setiap tahun dari tahun 2011 hingga 2015. Apakah kadar kekebalan terhadap beberapa ubat-ubatan (*multidrug resistance*) di kalangan kes baru Tibi di Malaysia.
9. PR-1341-L71907  
**Tuan Anuar bin Abd. Manap [ Sekijang ]** minta **MENTERI PERUSAHAAN PERLADANGAN DAN KOMODITI** menyatakan perkembangan terkini industri biodiesel negara serta nyatakan pelan khusus yang dirancang Kementerian dalam mempelbagaikan produk hiliran sawit termasuklah dalam persediaan menghadapi Perjanjian Perkongsian Trans-Pasifik (TPPA).
10. PR-1341-L72178  
**Datuk Mohd Idris bin Jusi [ Batu Pahat ]** minta **MENTERI PENDIDIKAN TINGGI** menyatakan berapa ramai graduan universiti peringkat Ijazah dan Diploma yang keluar dalam tahun pengajian 2014 dan 2015 dan berapa peratus daripada mereka yang telah mendapat pekerjaan.
11. PR-1341-L71843  
**Datuk Aaron Ago anak Dagang [ Kanowit ]** minta **PERDANA MENTERI** menyatakan tentang perancangan pihak Kerajaan dalam usaha untuk memastikan keharmonian negara kita yang memiliki rakyat yang berbilang kaum serta budaya terjamin dan terpelihara.
12. PR-1341-L71695  
**Dato' Kamarul Baharin bin Abbas [ Telok Kemang ]** minta **MENTERI KEMAJUAN LUAR BANDAR DAN WILAYAH** menyatakan :-
  - (a) sebab-sebab mengapa jumlah pelajar tajaan MARA berkurang secara mendadak iaitu daripada 42,898 orang pelajar pada tahun 2014 kepada hanya 8,863 orang pelajar sahaja pada tahun 2015; dan

- (b) apakah anggaran jumlah pelajar yang akan ditaja tiap-tiap tahun bagi tahun ini dan 2 tahun akan datang.
13. PR-1341-L72050  
**Dato' Noraini binti Ahmad [ Parit Sulong ]** minta **PERDANA MENTERI** menyatakan jumlah kelulusan sijil HALAL yang telah dikeluarkan oleh JAKIM dan perincian kelulusan mengikut status pemilikan syarikat (kepunyaan milik Islam dan bukan Islam).
14. PR-1341-L72908  
**Tuan Sim Chee Keong [ Bukit Mertajam ]** minta **MENTERI PENDIDIKAN TINGGI** menyatakan statistik mahasiswa IPTA yang gagal menamatkan pengajian setiap tahun dari 2010-2015 ikut pecahan universiti, gender, kaum, negeri asal, kursus pengajian, serta sama ada menerima pinjaman atau biasiswa kerajaan. Sila nyatakan faktor-faktor utama mengapa mereka gagal menamatkan pengajian.
15. PR-1341-L72260  
**Dato' Hasbullah bin Osman [ Gerik ]** minta **MENTERI KERJA RAYA** menyatakan adakah pihak Kementerian bercadang untuk menggunakan teknologi baru dalam infrastruktur jalan raya yang lebih berketahanan tinggi terhadap jalan yang telah rosak yang boleh mengundang risiko kemalangan terhadap rakyat.
16. PR-1341-L73182  
**Tuan Lim Guan Eng [ Bagan ]** minta **MENTERI PENGANGKUTAN** menyatakan apakah alasan Suruhanjaya Pelabuhan Pulau Pinang (SPPP) mengurangkan jumlah operasi feri mulai 1 Januari 2016 dan tempoh masa operasi harian. Apakah kerugian setiap tahun sejak ia mula operasi dan mengapakah bilangan feri tidak ditambah bila pengangkutan awam bergantung kepada *scalability*.
17. PR-1341-L73621  
**Tuan Haji Ahmad Lai bin Bujang [ Sibuti ]** minta **MENTERI KEMAJUAN LUAR BANDAR DAN WILAYAH** menyatakan beberapa jumlah projek tiang lampu yang dijanjikan dalam Bajet 2015 di mana terdapat peruntukan 10 batang lampu setiap kampung bagi Parlimen Sibuti.
18. PR-1341-L72454  
**Ust. Datuk Dr. Mohd. Khairuddin bin Aman Razali [ Kuala Nerus ]** minta **MENTERI KESIHATAN** menyatakan pelaksanaan peraturan-peraturan berkaitan pemakaian seragam patuh syariah bagi doktor dan jururawat beragama Islam di hospital kerajaan dan swasta.
19. PR-1341-L73636  
**Datuk Abd Rahim bin Bakri [ Kudat ]** minta **MENTERI KOMUNIKASI DAN MULTIMEDIA** menyatakan apakah tindakan yang telah diambil oleh Kementerian di dalam menangani masalah liputan telefon selular khususnya Celcom di Daerah Pitas yang sering terganggu dan sukar mendapat liputan.

20. PR-1341-L72217  
**Tuan Haji Nasrudin bin Hassan [ Temerloh ]** minta **MENTERI PENDIDIKAN** menyatakan perkembangan terkini Program Dwi Bahasa (DLP) yang telah dirintis oleh PEMANDU dan PADU dalam mempertingkatkan penguasaan Bahasa Inggeris dalam kalangan pelajar sekolah.
21. PR-1341-L73518  
**Datuk Koh Nai Kwong [ Alor Gajah ]** minta **MENTERI SUMBER ASLI DAN ALAM SEKITAR** menyatakan apakah semakan semula yang akan dirangka oleh Kementerian untuk memperkukuhkan Akta Kualiti Alam Sekeliling 1974 (Akta 127).
22. PR-1341-L73016  
**Tuan Wong Sze Phin @ Jimmy [ Kota Kinabalu ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan dasar Kerajaan dalam mengawal harga rumah dan memenuhi permintaan rumah kos rendah dan mampu milik di Sabah. Nyatakan jumlah penerima Program Perumahan Rakyat (PPR) mengikut kawasan atau daerah yang terlibat dalam PPR di seluruh Sabah.
23. PR-1341-L71622  
**Dato' Haji Mohd Zaim bin Abu Hasan [ Parit ]** minta **MENTERI DALAM NEGERI** menyatakan rasional di sebalik kenaikan levi pengambilan pekerja asing yang menimbulkan keresahan di kalangan pengusaha industri.
24. PR-1341-L72074  
**Tuan Tan Kok Wai [ Cheras ]** minta **MENTERI SUMBER ASLI DAN ALAM SEKITAR** menyatakan apakah langkah-langkah penting yang akan diambil oleh Malaysia untuk menyelamatkan bumi berikutan Persidangan Perubahan Iklim PBB di Paris pada Disember lalu.
25. PR-1341-L72867  
**Datuk Dr. Makin @ Marcus Mojigoh [ Putatan ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan :-
- (a) berikutan dengan permintaan yang tinggi ke atas projek perumahan rakyat (PPR) di Putatan , adakah pihak Kerajaan bercadang untuk mendirikan lebih banyak lagi PPR khususnya di Putatan; dan
  - (b) adakah pihak Kementerian bersedia untuk memberikan kuasa kepada wakil rakyat memberikan kelulusan untuk penghuni PPR tersebut.
26. PR-1341-L71989  
**Tuan Ng Wei Aik [ Tanjong ]** minta **MENTERI KEWANGAN** menyatakan bilakah Jabatan Kastam Diraja Malaysia akan menguatkuasakan Seksyen 9(5) dan 9(7) Akta GST 2014 supaya semua harga barangan dan perkhidmatan yang dipaparkan adalah inklusif cukai GST bagi mengelakkan orang awam diputarbelitkan.

27. PR-1341-L73486  
**Datuk William @ Nyallau anak Badak [ Lubok Antu ]** minta **PERDANA MENTERI** menyatakan kemajuan pelaksanaan skim pinjaman untuk rumah-rumah panjang dilaksanakan dan apakah syarat-syarat serta kaedah-kaedah kepada peminjam-peminjam untuk mendapatkan skim tersebut.
28. PR-1341-L71677  
**Dr. Che Rosli bin Che Mat [ Hulu Langat ]** minta **MENTERI TENAGA, TEKNOLOGI HIJAU DAN AIR** menyatakan jumlah keperluan tenaga elektrik semasa di seluruh Malaysia (amnya) dan Semenanjung Malaysia (khasnya) memandangkan pembangunan industri dan perumahan berkembang dengan pesat. Berapa banyakkah sumbangan tenaga solar dalam mencapai keperluan di atas.
29. PR-1341-L72823  
**Datuk Raime bin Unggi [ Tenom ]** minta **MENTERI SUMBER ASLI DAN ALAM SEKITAR** menyatakan apakah cabaran yang dihadapi Malaysia dalam melaksanakan obligasi negara terhadap Protokol Montreal tersebut.
30. PR-1341-L72840  
**Puan Teo Nie Ching [ Kulai ]** minta **MENTERI PEMBANGUNAN WANITA, KELUARGA DAN MASYARAKAT** menyatakan jumlah perkahwinan yang melibatkan warganegara yang belum mencapai umur 16 tahun dan apa rancangan untuk melarang perkahwinan kanak-kanak bawah umur memandangkan Malaysia telah menerima satu Resolusi UN untuk menghapuskan perkahwinan kanak-kanak pada Oktober 2013.
31. PR-1341-L72742  
**Dr. Ismail bin Daut [ Merbok ]** minta **MENTERI DALAM NEGERI** menyatakan jumlah serta kos pembelian dan pemasangan Sistem Pengesanan Nombor Pendaftaran Automatik (ANPR) pada kenderaan peronda polis bagi mengesan pesalah trafik yang mempunyai waran tangkap dan saman tertunggak.
32. PR-1341-L73607  
**Dato' Sri Hasan bin Malek [ Kuala Pilah ]** minta **MENTERI PENDIDIKAN** menyatakan kajian secara menyeluruh berkaitan bebanan tugas guru pada hari ini dan apakah hasil daripada kajian tersebut. Sekiranya telah dibuat, mengapakah pihak Kementerian mengambil masa yang lama untuk melaporkan hasil kajian ini bagi tatapan umum.
33. PR-1341-L73484  
**Tuan Haji Ahmad Nazlan bin Idris [ Jerantut ]** minta **MENTERI PENDIDIKAN** menyatakan apakah langkah-langkah yang diambil oleh Kementerian bagi memastikan bilangan guru-guru yang dilatih dan dilantik bersesuaian dengan keperluan sebenar Kementerian.
34. PR-1341-L73564  
**Tuan Charles Anthony Santiago [ Klang ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan kesediaan Kerajaan untuk mewajibkan sistem penuaian air hujan (*rainwater harvesting*) di semua rumah, pejabat dan kilang di Malaysia.

35. PR-1341-L72847  
**Ir. Shaharuddin bin Ismail [ Kangar ]** minta **MENTERI PERTANIAN DAN INDUSTRI ASAS TANI** menyatakan apakah langkah transformasi yang diambil oleh Kerajaan khususnya dalam usaha untuk melahirkan lebih ramai pengusaha tanaman mangga Harum Manis menjurus ke arah negara berpendapatan tinggi menjelang 2020 serta memenuhi permintaan yang tinggi dalam pasaran tempatan mahupun antarabangsa.
36. PR-1341-L72872  
**Tuan Sim Tze Tzin [ Bayan Baru ]** minta **MENTERI PENDIDIKAN TINGGI** menyatakan sama ada berlaku pelajar universiti yang mengalami kelaparan. Nyatakan punca-punca berlaku kes sebegini.
37. PR-1341-L72338  
**Datuk Noor Ehsanuddin bin Mohd Harun Narrashid [ Kota Tinggi ]** minta **MENTERI PERTANIAN DAN INDUSTRI ASAS TANI** menyatakan apakah langkah-langkah Kementerian untuk meningkatkan penglibatan para petani dan juga nelayan dalam industri akuakultur.
38. PR-1341-L72998  
**Puan Rubiah binti Haji Wang [ Kota Samarahan ]** minta **MENTERI SUMBER ASLI DAN ALAM SEKITAR** menyatakan apakah langkah serta usaha yang diambil oleh pihak Kementerian dalam memperkasakan lagi kesedaran terhadap penjagaan alam sekitar di Malaysia terutamanya bagi membendung daripada berlakunya pencemaran sungai kerana air adalah sumber utama kehidupan.
39. PR-1341-L72301  
**Tuan Jeff Ooi Chuan Aun [ Jelutong ]** minta **MENTERI SUMBER ASLI DAN ALAM SEKITAR** menyatakan apa kedudukan terkini mengenai peruntukan Fasa 2 Rancangan Tebatan Banjir Sungai Pinang, Jelutong, yang telah tertunda-tunda sejak RMK-9 (2005-2010) supaya projek tersebut dapat dijalankan tanpa lengah lagi.
40. PR-1341-L72973  
**Tuan Nga Kor Ming [ Taiping ]** minta **MENTERI PENDIDIKAN** menyatakan jumlah bilangan guru yang kekurangan mengikut aliran sekolah SK, SJK(C), SJK(T), Sekolah Agama, Sekolah Mubaligh serta SMK dan SMJK sehingga hari ini.
41. PR-1341-L72006  
**Datuk Joseph Salang anak Gandum [ Julau ]** minta **PERDANA MENTERI** menyatakan program-program yang dianjurkan oleh Biro Tata Negara (BTN) dalam mengurangkan persepsi negatif bahawa Sabah dan Sarawak dianak tirikan oleh Kerajaan Persekutuan.
42. PR-1341-L71753  
**Dr. Azman bin Ismail [ Kuala Kedah ]** minta **MENTERI PELANCONGAN DAN KEBUDAYAAN** menyatakan data terbaru kemasukan pelancong-pelancong asing ke Malaysia dan jumlah perbelanjaan pelancong asing di Malaysia mengikut negara.

43. PR-1341-L73208  
**Dato' Seri Abdul Hadi bin Awang [ Marang ]** minta **MENTERI DALAM NEGERI** menyatakan apakah langkah bijak bagi Kerajaan untuk mengawal peningkatan kadar jenayah dan sosial yang melibatkan warga asing dan apakah motif Kerajaan sebenarnya membawa masuk 1.5 juta pekerja asing dalam tempoh beberapa tahun sebelum Pilihan Raya Umum ke-14.
44. PR-1341-L72290  
**Dato' Takiyuddin bin Hassan [ Kota Bharu ]** minta **MENTERI DALAM NEGERI** menyatakan jumlah Permit Bawa Masuk Pekerja Asing dikeluarkan mulai tahun 2013 hingga kini dan berapakah jumlah levi yang dipungut dalam tempoh yang sama.
45. PR-1341-L72941  
**Tuan Ignatius Dorell Leiking [ Penampang ]** minta **MENTERI PENDIDIKAN TINGGI** menyatakan apa sebab Kementerian setuju dengan tindakan UiTM menganjurkan seminar yang berbaur anti-kristian dan mengkritik agama kristian tahun lepas dan tahun sebelumnya; dan adakah Menteri akan setuju dengan mengadakan forum di UiTM yang akan memberi penerangan oleh pihak pakar-pakar agama Kristian supaya budaya saling menghormati antara semua agama akan dicapai.
46. PR-1341-L71671  
**Tuan Wilson Ugak Kumbong [ Hulu Rajang ]** minta **MENTERI PENDIDIKAN** menyatakan apakah usaha Kementerian untuk meningkatkan pengambilan peserta dari negeri Sarawak memasuki Maktab Pendidikan Guru.
47. PR-1341-L73053  
**Dato' Shamsul Anuar bin Haji Nasarah [ Lenggong ]** minta **MENTERI KEWANGAN** menyatakan sejauh mana kadar GST sedia ada akan diteruskan atau adakah Kementerian bercadang untuk memperhalusi semula kadar tersebut pada masa akan datang.
48. PR-1341-L72447  
**Puan Siti Zailah binti Mohd Yusoff [ Rantau Panjang ]** minta **MENTERI PERDAGANGAN ANTARABANGSA DAN INDUSTRI** menyatakan apakah terma-terma dan syarat yang dikenakan oleh TPPA jika Malaysia ingin keluar dari TPPA setelah perjanjian ini ditandatangani.
49. PR-1341-L72672  
**Tuan Gobind Singh Deo [ Puchong ]** minta **PERDANA MENTERI** menyatakan apakah status siasatan Suruhanjaya Pencegahan Rasuah dalam aduan No. SPRM/CPM. 20/38/01.30 Jld 27(47) dan kenapa tiada tindakan yang diambil sehingga kini.
50. PR-1341-L72441  
**Tuan Chong Chieng Jen [ Bandar Kuching ]** minta **PERDANA MENTERI** menyatakan Perbelanjaan Pembangunan yang diperuntukkan untuk setiap kawasan Parlimen di Sarawak dalam tahun 2011 hingga 2015. Adakah peruntukan tersebut dihabis-gunakan oleh agensi-agensi Kerajaan.

51. PR-1341-L73393  
**Dato' Fauzi bin Abdul Rahman [ Indera Mahkota ]** minta **PERDANA MENTERI** menyatakan sebab-sebab saham FGV menjunam daripada RM3.50 semasa *listing* dan kini jatuh menjunam keparas lengkongan RM1.20. Apakah pihak yang berwajib tidak dapat membaca *trend* gerakan saham ini hingga peneroka digalak membeli saham FGV dan kini mengalami kerugian besar setiap mereka. Adakah kerajaan bercadang untuk membantu peneroka mengurangkan kerugian peneroka di atas kesilapan pengurusan ini.
52. PR-1341-L72410  
**Tuan Liew Chin Tong [ Kluang ]** minta **MENTERI SUMBER ASLI DAN ALAM SEKITAR** menyatakan perubahan keluasan tanah gambut, hutan simpanan kekal, hutan lipur, hutan bakau, dan paya dalam tempoh 1995 hingga 2016.
53. PR-1341-L71829  
**Tuan M. Kulasegaran [ Ipoh Barat ]** minta **MENTERI PENDIDIKAN** menyatakan sebab-sebab pengajaran dan pembelajaran Bahasa Tamil di SM dan SK (BTSSK) telah dihentikan atau dikurangkan bilangan kelas di kebanyakan sekolah pada awal tahun 2016 atas alasan penyelarasan Bajet 2016.
54. PR-1341-L72524  
**Tuan Ramkarpal Singh a/l Karpal Singh [ Bukit Gelugor ]** minta **MENTERI PENGANGKUTAN** menyatakan sama ada serpihan kapal terbang yang ditemui di perairan berdekatan Kepulauan Reunion dalam bulan Julai, 2015 adalah daripada MH370 dan samada Kerajaan adalah berpendirian bahawa MH370 tersebut telahpun terhempas di perairan tersebut dan sekiranya tidak, nyatakan pendirian Kerajaan terkini berkenaan status MH370 tersebut.
55. PR-1341-L72661  
**Dato' Ngeh Koo Ham [ Beruas ]** minta **PERDANA MENTERI** menyatakan sama ada Kerajaan bercadang meminda Seksyen 7 Akta Sivil 1956 (Akta 67) untuk menambah jumlah pampasan kedukacitaan (*damages for bereavement*) dan menggunakan angka 60 untuk pengiraan dan bukan 55 dalam seksyen tersebut memandangkan umur bersara sekarang telah ditetapkan pada umur 60.
56. PR-1341-L72026  
**Puan Hajah Fuziah binti Salleh [ Kuantan ]** minta **MENTERI PELANCONGAN DAN KEBUDAYAAN** menyatakan rancangan untuk mengusahakan pelancongan Islam, ekoran Sesi ke-9 Persidangan Menteri-menteri Pelancongan Islam (dari 21 hingga 23 Disember 2015 di Niamey, Niger).
57. PR-1341-L72604  
**Tuan Chua Tian Chang @ Tian Chua [ Batu ]** minta **MENTERI WILAYAH PERSEKUTUAN** menyatakan apakah rancangan Kementerian untuk melengkapkan kemudahan kesemua lif dan sekuriti di rumah pangsa PPR di Parlimen Batu. Adakah Kementerian merancang kenaikan taraf PPR dan flat kos rendah di Parlimen Batu.



58. PR-1341-L72732  
**Tuan Sim Tong Him [ Kota Melaka ]** minta **MENTERI KEWANGAN** menyatakan :-
- (a) jumlah hasil dapat dikutip sejak pelaksanaan GST sehingga bulan Disember 2015 dan anggaran kutipan hasil GST untuk tahun 2016; dan
  - (b) adakah kerajaan bercadang untuk menurun kadarnya dari 6% ke 4%, jika tidak apakah sebabnya.
59. PR-1341-L73094  
**Tuan William Leong Jee Keen [ Selayang ]** minta **MENTERI PERDAGANGAN ANTARABANGSA DAN INDUSTRI** menyatakan kesan-kesan ekonomi dan politik ke atas rakyat Malaysia dengan pelaksanaan TPPA yang diketuai oleh Amerika Syarikat dan Perkongsian Ekonomi Komprehensif Serantau (RCEP) yang diketuai oleh China.
60. PR-1341-L72920  
**Tuan Lim Lip Eng [ Segambut ]** minta **MENTERI PERDAGANGAN ANTARABANGSA DAN INDUSTRI** menyatakan nilai perdagangan dua hala di antara Israel dan Malaysia sejak tahun 2011 dan senarai jenis produk perdagangan kedua negara itu.
61. PR-1341-L72887  
**Datuk Hajah Norah binti Abd Rahman [ Tanjong Manis ]** minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan langkah-langkah jangka pendek dan jangka panjang yang diambil oleh Kerajaan dalam mengatasi masalah kenaikan harga barang makanan asas yang disebabkan oleh kejatuhan matawang ringgit berbanding matawang USD.
62. PR-1341-L73367  
**Dato' Ar. Wan Mohammad Khair-il Anuar bin Wan Ahmad [ Kuala Kangsar ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan sama ada Kementerian telah merangka lain-lain strategi khusus untuk membantu belia memiliki rumah selain daripada membina rumah mampu milik.
63. PR-1341-L72193  
**Puan Hajah Zuraida binti Kamaruddin [ Ampang ]** minta **PERDANA MENTERI** menyatakan tentang peruntukan 15 Juta terhadap Negeri Kedah yang tidak diperuntukkan juga kepada negeri-negeri lain.
64. PR-1341-L73538  
**Datuk Dr. Ewon Ebin [ Ranau ]** minta **PERDANA MENTERI** menyatakan sejak penubuhan Eastern Sabah Security Command (ESSCOM) pada Mac 2013:-
- (a) apakah jenis-jenis aset yang telah disediakan dan jumlah kos terlibat; dan
  - (b) jumlah anggota keselamatan yang terlibat dan berapakah sempadan negara dibolosi, sebab dibolosi dan tindakan untuk menghalang pembolosan ini.

65. PR-1341-L71706  
**Dato' Haji Abdul Rahman bin Haji Mohamad [ Lipis ]** minta **PERDANA MENTERI** menyatakan tindakan yang diambil terhadap penjawat awam yang membocorkan rahsia Kerajaan sejak akhir-akhir ini sehingga mendatangkan ketidakstabilan kepada situasi politik, ekonomi dan sosial negara.
66. PR-1341-L72479  
**Puan Hajah Normala binti Abdul Samad [ Pasir Gudang ]** minta **MENTERI SUMBER MANUSIA** menyatakan sejauh mana keberkesanan usaha membawa masuk 1.5 juta warga asing tidak mahir ke negara Malaysia dalam usaha menjadikan Malaysia sebagai negara maju.
67. PR-1341-L73473  
**Tan Sri Dato Sri William Mawan Ikom [ Saratok ]** minta **MENTERI SUMBER MANUSIA** menyatakan apakah bidang pekerjaan yang benar-benar memerlukan tenaga kerja asing di negara ini serta jumlah yang diperlukan.
68. PR-1341-L72419  
**Dato' Mohd Ariff Sabri bin Abdul Aziz [ Raub ]** minta **MENTERI KEWANGAN** menyatakan dalam jawapan kepada soalan saya dalam sesi Parlimen dahulu, sebanyak RM10 juta dari RM4 bilion digunakan untuk pelaburan ke atas lombong arang batu di Mongolia:-
- (a) ke manakah baki dari RM4 bilion ini digunakan; dan
- (b) berapakah baki yang ada dari dana ini dan sudahkah ia dikembalikan kepada KWAP.

\*\*\*\*\*

**ATURAN URUSAN MESYUARAT DAN USUL-USUL**

- |    |                |   |                               |
|----|----------------|---|-------------------------------|
| 1. | (D.R. 34/2015) | Rang Undang-undang Dadah Berbahaya (Langkah-Langkah Pencegahan Khas) (Pindaan) 2015 | <b>Bacaan Kali Yang Kedua</b> |
|    |                | <b>[Menteri Dalam Negeri]</b>   |                               |
| 2. | (D.R. 37/2015) | Rang Undang-undang Profesion Undang-undang (Pindaan) 2015                           | “                             |
|    |                | <b>[Menteri di Jabatan Perdana Menteri]</b>   |                               |
| 3. | (D.R. 39/2015) | Rang Undang-undang Kanak-Kanak (Pindaan) 2015                                       | “                             |
|    |                | <b>[Menteri Pembangunan Wanita, Keluarga dan Masyarakat]</b>                        |                               |
| 4. | (D.R. 3/2016 ) | Rang Undang-undang Institut Penyelidikan Perhutanan Malaysia 2016                   | “                             |
|    |                | <b>[Menteri Sumber Asli dan Alam Sekitar]</b>                                       |                               |
| 5. | (D.R.9/2015)   | Rang Undang-undang Kanun Tatacara Jenayah (Pindaan) 2015                            | “                             |
|    |                | <b>[Menteri di Jabatan Perdana Menteri]</b>   |                               |
| 6. | (D.R.12/2015)  | Rang Undang-undang Keterangan (Pindaan) 2015  | “                             |
|    |                | <b>[Menteri di Jabatan Perdana Menteri]</b>   |                               |
| 7. | (D.R.1/2016)   | Rang Undang-undang Bekalan Gas (Pindaan) 2016                                       | “                             |
|    |                | <b>[Menteri di Jabatan Perdana Menteri]</b>   |                               |
| 8. | (D.R.35/2015)  | Rang Undang-undang Persaingan (Pindaan) 2015  | “                             |
|    |                | <b>[Menteri Perdagangan Dalam Negeri, Koperasi dan Kepenggunaan]</b>                |                               |

9. PR-1341-U72985

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa pembangunan infrastruktur di negeri Sabah masih jauh ketinggalan berbanding dengan negeri-negeri lain di Malaysia. Dan mengambil maklum juga bahawa negeri Sabah memerlukan lebih banyak dana demi untuk membangunkan kemudahan infrastruktur sekali di kawasan luar bandar serta keperluan-keperluan lain seperti masalah tebatan banjir, projek perumahan rakyat termiskin dan lain-lain. Dan mengambil maklum juga bahawa rakyat negeri Sabah juga beraspirasi seperti rakyat negeri Sarawak, sepertimana yang dinyatakan oleh YAB Tan Sri Adenan Satem (Ketua Menteri Sarawak) ingin memohon agar royalti minyak dapat dinaikkan kepada kadar 20%. Dan mengambil maklum juga, sekiranya royalti minyak dinaikkan pada kadar 20%, maka dengan lebih dana tersebut, kerajaan negeri Sabah akan dapat melaksanakan keperluan-keperluan di atas dengan lebih baik dan cepat lagi. Maka, bagi meredakan rungutan dan tuntutan rakyat negeri Sabah, maka Dewan yang mulia ini hendaklah mengambil ketetapan bahawa Kerajaan Malaysia menaikkan kadar royalti minyak bagi negeri Sabah kepada kadar 20% dan sekaligus membolehkan negeri Sabah membangun dengan lebih pesat lagi."

**[ Perdana Menteri ]**

10. PR-1341-U73002

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa kesesakan Jalan Putatan merupakan rungutan hampir setiap pengguna jalan tersebut. Dan mengambil maklum juga bahawa Jalan Putatan merupakan sebahagian daripada rangkaian Jalan Pan Borneo Highway yang mana sepatutnya mendapat perhatian utama dan bebas kesesakan. Dan mengambil maklum juga, bahawa kesesakan Jalan Putatan juga disebabkan rekabentuk yang kurang baik di mana terdapat terlalu banyak U-Turn dan simpang, yang menjadi penyebab utama kelancaran aliran trafik selain menjadi punca kemalangan. Dan mengambil maklum juga, bahawa kesesakan Jalan Putatan dapat diatasi dengan membina sebatang Jalan Pantai (Coastal Highway) alternatif yang menghubungkan pekan Tanjung Aru dengan Pekan Kinarut. Dan mengambil maklum juga bahawa, sekiranya jalan pantai alternatif yang dimaksudkan dibina, ianya juga boleh membantu untuk mengelakkan hakisan pantai di sepanjang laluan tersebut. Dan mengambil maklum juga bahawa, untuk membina jalan baru sebagai laluan alternatif bagi Jalan Putatan akan menelan belanja yang besar terutama sekali bagi tujuan pampasan tanah yang dilalui. Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan Malaysia hendaklah membina jalan pantai alternatif bagi Jalan Putatan demi untuk keselesaan rakyat yang menggunakan laluan tersebut."

**[ Menteri Kerja Raya ]**

11. PR-1341-U73023

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa keengganan Kerajaan Persekutuan untuk mengiktiraf keputusan Peperiksaan Unified Examination Certificate (UEC) telah menimbulkan banyak kontroversi dan masalah terutama sekali kepada pelajar dan ibu/bapa pelajar yang terlibat. Dan mengambil maklum juga bahawa Negeri Sarawak merupakan negeri pertama di negara ini yang mengiktiraf keputusan peperiksaan UEC sepertimana yang diumumkan oleh YAB Tan Sri Adenan Satem dan sekali gus membolehkan pelajar terlibat meneruskan pengajian mereka dengan tanpa halangan di negeri Sarawak, misalnya di Universiti Malaysia Sarawak. Dan mengambil maklum juga bahawa dengan keengganan Kerajaan Malaysia untuk mengiktiraf keputusan peperiksaan UEC, pelajar yang terlibat terpaksa meneruskan pendidikan mereka di luar negara dan seterusnya bekerja serta menetap di luar negara adalah merupakan kerugian besar negara sebagaimana yang ditekankan oleh YAB Ketua Menteri Sarawak. Dan mengambil maklum juga, bahawa ramai pelajar dan ibu/bapa menganggap bahawa polisi untuk tidak mengiktiraf keputusan peperiksaan UEC ini bersifat diskriminasi di mana pelajar tersebut tidak berpeluang untuk berkhidmat dengan sektor awam di Malaysia. Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan Malaysia hendaklah mengiktiraf keputusan peperiksaan Unified Examination Certificate bagi membolehkan pelajar yang terlibat meneruskan pendidikan mereka di negara ini serta berkhidmat di sektor awam di negara ini."

**[Menteri Pendidikan ]**

12. PR-1341-U73036

**Datuk Dr. Makin @ Marcus Mojigoh [ Putatan ]** akan mencadangkan:-

Bahawa Dewan ini mengambil maklum bahawa kualiti air Sungai Sembulan adalah amat tercemar dan tidak sihat sama ada bagi hidupan marin mahupun bagi ekosistem marin negara ini. Dan mengambil maklum juga bahawa Sungai Sembulan merupakan rangkaian akhir aliran air dari beberapa siri saliran dan parit daripada beberapa taman perumahan yang berpenduduk padat, sebelum aliran air dilepaskan ke laut. Dan mengambil maklum juga bahawa kebanyakan sistem merawat air kumbahan yang ada di kawasan perumahan yang terlibat tidak lagi efisien untuk merawat air kumbahan tersebut sebelum dilepaskan ke saliran-saliran atau parit-parit yang akhirnya mengalir ke Sungai Sembulan sebelum berakhir ke laut. Dan mengambil maklum juga bahawa sebahagian besar terumbu karang di sekitar perairan negeri Sabah telah musnah disebabkan oleh aktiviti manusia seperti pelepasan air kumbahan yang tidak terawat ke laut. Diketahui bahawa kemusnahan terumbu karang (Coral Bleaching) merupakan satu daripada penyebab utama pemanasan global. Dan mengambil maklum juga bahawa negara Malaysia adalah merupakan salah sebuah negara penyokong dan pendokong gerakan United Nation Environment Programme (UNEP) sesuai dengan deklarasi Global Climate Change Conference, Copenhagen 2009.

Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah menyediakan satu dana khas bagi tujuan pembinaan loji rawatan air kumbahan di sekitar Sungai Sembulan sebelum air sungai tersebut dilepaskan ke laut bagi menyelamatkan ekosistem laut negara ini."

**[ Menteri Sumber Asli dan Alam Sekitar ]**

13. PR-1341-U71877

**Tuan M. Kulasegaran [ Ipoh Barat ]** akan mencadangkan:-

"Bahawa Dewan ini hendaklah mengambil maklum bahawa rang undang-undang harus digubal untuk mengelakkan kes penukaran agama kanak-kanak di bawah umur secara unilateral dengan adanya penguatkuasaan undang-undang yang sewajarnya serta berpadanan dengan nasihat Kabinet pada 2009 iaitu kanak-kanak dikekalkan agama asal mereka sebelum penukaran agama itu berlaku."

**[ Perdana Menteri ]**

14. PR-1341-U73419

**Dr. Tan Seng Giaw [ Kepong ]** akan mencadangkan:-

"Bahawa Dewan akan membincangkan keberkesanan Malaysia mencegah serangan ganas."

**[ Menteri Dalam Negeri ]**

15. PR-1341-U71858

**Tuan Fong Kui Lun [ Bukit Bintang ]** akan mencadangkan:-

"Bahawa Kerajaan mempergiatkan usaha untuk menyatupadukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 58 tahun lalu supaya mereka boleh hidup dengan aman dan saling memerlukan dan memahami bagi memudahkan mereka membangunkan ekonomi negara secara bersama dan merealisasikan impian Malaysia."

**[ Perdana Menteri ]**

16. PR-1341-U71862

**Tuan Fong Kui Lun [ Bukit Bintang ]** akan mencadangkan:-

"Bahawa Kerajaan memulihkan pilihan raya kerajaan tempatan seluruh negara supaya urus tadbir Kerajaan menjadi lebih cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat."

**[ Menteri Kesejahteraan Bandar, Perumahan dan Kerajaan Tempatan ]**

17. PR-1341-U71883

**Dato' Johari bin Abdul [ Sungai Petani ]** akan mencadangkan:-

"Bahawa Dewan ini mengambil maklum serta menyedari bahawa Lembaga Tabung Haji adalah sebuah institusi kewangan yang penuh dengan kejayaan dan amat membanggakan rakyat Malaysia khususnya umat Islam. Institusi ini juga menjadi contoh untuk negara Islam yang lain ikuti. Maka ianya mesti dijaga dengan penuh ketelusan dan amanah. Sebarang penyelewangan wajib diambil tindakan pantas dan menyeluruh dan jika ianya runtuh maka orang yang mesti dipersalahkan ialah Perdana Menteri."

**[ Perdana Menteri ]**

18. PR-1341-U71884

**Dato' Johari bin Abdul [ Sungai Petani ]** akan mencadangkan:-

"Bahawa Dewan ini mengambil maklum bahawa Yayasan Pembangunan Ekonomi Islam Malaysia (YaPEIM) sebuah pertubuhan yang mendapat sokongan umat Islam di Malaysia. Yayasan ini tertegak dengan niat yang penuh suci bagi membangunkan ekonomi umat Islam di samping menolong mereka yang tidak bernasib baik. Oleh sebab itu sokongan berterusan dari individu dan institusi kepada Yayasan ini membuktikan umat Islam negara ini amat prihatin dengan apa yang terjadi dalam masyarakat Islam. Tetapi membiarkan segelintir individu mengambil kesempatan dari kejayaan Yayasan ini hendaklah dikutuk sekeras-kerasnya. Tindakan lembab oleh Menteri dan Kerajaan dalam memantau perjalanan kewangan Yayasan ini juga harus menerima celaan. Sepatutnya semua pihak yang membelanjakan wang YaPEIM bukan pada tempatnya walaupun 'legally right' tetapi tetap 'morally wrong', mesti bertanggung jawab dan meletakkan jawatan atas kadar segera."

**[ Perdana Menteri ]**

19. PR-1341-U71886

**Dato' Johari bin Abdul [ Sungai Petani ]** akan mencadangkan:-

"Bahawa Dewan ini mengambil maklum kehidupan rakyat makin dihipit dengan harga barangan yang makin naik dan tidak terkawal akibat pengenalan cukai GST dan pengecilan nilai Ringgit. Semua rakyat di setiap lapisan masyarakat amat merasai keadaan ini. Kerajaan harus bertindak berani seperti yang pernah dilakukan oleh Mantan Perdana Menteri Tun Dr Mahathir Mohamad bila negara menghadapi masalah ekonomi yang mencemaskan pada penghujung tahun 90an. Tindakan utama yang mesti diambil sekarang ialah dengan mengurangkan perbelanjaan di Jabatan Perdana Menteri dan Kerajaan mesti mengamalkan sikap berjimat cermat di semua peringkat pentadbiran negara."

**[ Menteri Kewangan ]**

20. PR-1341-U71888

**Dato' Johari bin Abdul [ Sungai Petani ]** akan mencadangkan:-

"Bahawa Dewan ini menggesa Kementerian Pendidikan mengambil langkah-langkah segera supaya pelajar-pelajar kita mempunyai pengetahuan dan kebolehan bertutur dalam banyak bahasa terutamanya Bahasa Inggeris, Arab dan Mandarin akan membantu pelajar-pelajar kita bila meninggalkan alam persekolahan dan universiti nanti. Bahasa ini amat luas digunakan dalam kegiatan harian dan perniagaan dalam negeri dan luar negara. Majikan pasti akan mengambil pekerja yang berkebolehan lebih dari satu bahasa, kerana ianya akan menguntungkan majikan dalam banyak aspek. Ketiga-tiga bahasa ini bukanlah sesuatu yang asing bagi kita. Kerajaan harus melihat bagaimana mengintegrasikan pengajaran bahasa-bahasa ini ke dalam sistem pendidikan yang sedia ada. Bayangkan seorang anak Malaysia fasih berbahasa Inggeris, Arab, Mandarin dan dapat mengungkapkan Bahasa Malaysia yang teratur. Sayang sekali apa yang kita sedia ada tidak dimanfaatkan untuk generasi akan datang."

**[Menteri Pendidikan ]**

21. PR-1341-U71890

**Dato' Johari bin Abdul [ Sungai Petani ]** akan mencadangkan:-

"Bahawa Dewan ini mengambil maklum data jumlah pendatang asing yang berdokumen dan tidak berdokumen akan berbeza dari satu agensi kerajaan dengan agensi yang lain. Malah Menteri sendiri menjawab dalam Dewan Parlimen dengan menggunakan perkataan "ini anggaran". Ini bermaksud tiada siapa yang mempunyai data sebenar tentang berapa jumlah Bukan Rakyat Malaysia yang berada di sini. Ini amat membahayakan negara. Kerajaan mesti mengambil tindakan yang berterusan bagi mendaftar mereka yang tidak berdokumen. Tindakan mendaftar dengan mengambil tindakan undang-undang terhadap mereka adalah dua perkara yang berbeza. Yang penting adalah setiap manusia yang berada di negara ini mesti mempunyai dokumen. Tindakan segera mesti diambil dan mestilah berterusan."

**[Menteri Dalam Negeri ]**

22. PR-1341-U72582

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gejala pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu diketatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat



Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama."

**[ Menteri Kesejahteraan Bandar, Perumahan dan Kerajaan Tempatan ]**

23. PR-1341-U72584

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan."

**[ Menteri Dalam Negeri ]**

24. PR-1341-U72589

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia."

**[ Menteri Pendidikan ]**

25. PR-1341-U72617

**Tuan Chua Tian Chang @ Tian Chua [ Batu ]** akan mencadangkan:-

"Bahawa Dewan ini akan menggesa Kerajaan untuk menegakkan prinsip berkecuali sebagaimana yang ditetapkan dalam Non-Alliance Movement (NAM) dan menegaskan bahawa Malaysia tidak akan mengambil bahagian atau menghantar askar untuk menyertai gabungan tentera yang dipimpin Arab Saudi dalam serangan terhadap Yemen, Syria atau mana-mana negara di Timur Tengah."

**[Menteri Luar Negeri ]**

26. PR-1341-U72624

**Tuan Chua Tian Chang @ Tian Chua [ Batu ]** akan mencadangkan:-

"Bahawa Dewan ini menggesa Kerajaan untuk membantu penganggur dengan menyediakan bantuan kewangan secara tunai sebanyak RM1200 sebulan untuk tempoh 3 bulan selepas diberhentikan. Skim ini membolehkan pekerja-pekerja yang menganggur menjamin sara hidup mereka sewaktu mencari pekerjaan baru."

**[Menteri Sumber Manusia ]**

**RISALAT-RISALAT YANG DIBAWA KE DALAM MESYUARAT  
(DEWAN RAKYAT)**

<b><u>TAHUN 2016</u></b>	<b><u>RISALAT/DOKUMEN</u></b>	<b><u>TARIKH DIBENTANGKAN</u></b>
ST. 34	Laporan Tahunan dan Penyata Kewangan Universiti Kebangsaan Malaysia (UKM) Bagi Tahun 2014.	5 April 2016
ST. 44	Laporan Tahunan dan Penyata Kewangan Dewan Bahasa dan Pustaka Bagi Tahun 2014.	5 April 2016
ST. 47	Laporan Tahunan Suruhanjaya Kehakiman Bagi Tahun 2015.	5 April 2016
ST. 48	Laporan Tahunan dan Penyata Kewangan Universiti Malaysia Sarawak (UNIMAS) Bagi Tahun 2014.	5 April 2016
ST. 49	Laporan Tahunan dan Penyata Kewangan Universiti Malaysia Terengganu (UMT) Bagi Tahun 2014.	5 April 2016
ST. 50	Laporan Tahunan dan Penyata Kewangan Universiti Pertahanan Nasional Malaysia (UPNM) Bagi Tahun 2014.	5 April 2016
ST. 52	Laporan Tahunan dan Penyata Kewangan Kumpulan Wang Simpanan Pekerja (KWSP) Bagi Tahun 2015.	5 April 2016
ST. 53	Laporan Tahunan dan Penyata Kewangan Perbadanan Insurans Deposit Malaysia (PIDM) Bagi Tahun 2015.	5 April 2016